



Foto: telemach.ba

## Demant "Telemacha" na tekst: "Hoće li od januara 2020. građanima BiH biti uveden dodatni porez od 10 odsto?"

18. Januara 2020. / blportal

Na adresu BL PORTAL-a u petak 17. januara 2020. godine stigao je demant Društva "TELEMACH" d.o.o. Sarajevo.

Demant se odnosi na preneseni tekst na BL PORTAL-u pod naslovom "Hoće li od januara 2020. građanima BiH biti uveden dodatni porez od 10 odsto?".

Ovim putem se javno izvinjavamo Društvu "Telemach" ako je došlo do nekih neugodnosti i ujedno ističemo da BL PORTAL nije autor spornog teksta.

Želimo još da napomenemo, da smo 10. januara i prije ovog zvaničnog zahtjeva za demantom, prenijeli zvanično **saopštenje Telemacha** kojim se demantuju svi navodi u spornom tekstu.

Demant prenosimo u cijelosti.

**Predmet: Zahtjev za objavu demanta – ispravku pogrešnih navoda, u vezi sa tekstom objavljenim dana 4. januara 2020. godine, na web portalu [www.bl-portal.com](http://www.bl-portal.com), pod naslovom: „Hoće li od januara 2020. građanima BiH biti uveden dodatni porez od 10 odsto?“**

Poštovani,

Dana 4. januara 2020. godine, na web portalu [www.bl-portal.com](http://www.bl-portal.com), koji uređujete, objavljen je tekst pod naslovom: „Hoće li od januara 2020. građanima BiH biti uveden dodatni porez od 10 odsto?“

U navedenom tekstu, bez bilo kakve prethodne provjere informacija sa Telemachom ili eventualno kroz uvid u dostupne javne registre, tendenciozno je iznesen/pronesen niz neistinitih navoda, čiji je cilj očigledno nanošenje štete Telemachu kroz narušavanje njegove reputacije na tržištu.

Imajući u vidu gore navedeno, radi pravilnog izvještavanja javnosti i građana BiH, Telemach ovim putem, a u smislu odredbe člana 8. Zakona o zaštiti od klevete podnosi Zahtjev za objavu demanta – ispravku pogrešnih navoda slijedećeg sadržaja:

*"Demant na tekst pod naslovom: „Hoće li od januara 2020. građanima BiH biti uveden dodatni porez od 10 odsto?"*

*Suprotno navodima objavljenim dana 4. januara 2020. godine na web portalu [www.bl-portal.com](http://www.bl-portal.com) u tekstu pod naslovom „Hoće li od januara 2020. građanima BiH biti uveden dodatni porez od 10 odsto?“, a u kojem se Telemach pokušava predstaviti kao kompanija koja korisnicima namjerava uvesti „dodatni porez od 10 odsto“ kroz plaćanje naknade za reemitovanje TV kanala NOVA BH, ovim putem ističemo kako NOVA BH na tržištu BiH posluje kao samostalno pravno lice NOVA BH d.o.o. Sarajevo, te samim tim samostalno i potpuno neovisno od Telemacha određuje svoju poslovnu politiku i komercijalne uslove pružanja svojih usluga.*

S tim u vezi, netačne su informacije objavljene u spornom tekstu na web portalu [www.bi-portal.com](http://www.bi-portal.com) kojima se pogrešno pokušava predstaviti da Telemach vrši emitovanje ovog kanala, da naplaćuje naknade za emitovanje TV kanala NOVA BH, a posebno da Telemach na bilo koji način pokušava da utiče na RAK da vrši izmjenu propisa iz svoje nadležnosti koji bi omogućili Telemachu da vrši naplatu za emitovanje bilo

kojeg pojedinačnog TV kanala, a s obzirom da se Telemach uopšte ne bavi emitovanjem. Posebno su bespredmetni i maliciozni navodi da Telemach uvodi porez građanima BiH, čime se samo vrši zastrašivanje i uzbunjivanje građana i stvara lažna slika da neka privatna firma može da uvede poresku obavezu. Kao što je svima poznato, takvu obavezu može da uvede samo država.

Svim, pa čak i površnim, poznavateljima regulative u sektoru medija i telekomunikacija, jasno je da su navodi iz Vašeg teksta potpuno netačni i apsurdni iz ugla sektorskih propisa. Posebno ističemo da je netačnost svih navoda iz Vašeg teksta potvrdila i Regulatorna agencija za komunikacije BiH, čije su ovlaštene osobe izrazile zabrinutost „plasiranjem dezinformacija“ putem Vašeg portala (<https://faktor.ba/vijest/odobasic-nije-tacno-da-je-rak-odobrio-telemachu-ubiranje-poreza-od-gradana-bih/65781>). U ovom intervjuu ovlaštenih predstavnika Regulatorne agencije za komunikacije BiH se detaljno pojašnjava sektorska regulativa, naglašava da u postupanju svih subjekata (Nova BH, te operatera – kako onih koji su prihvatili ponudu, tako i onih koji nisu) nema ništa nezakonito, te je očigledno da se radi o čisto komercijalnim odlukama svakog od poslovnih subjekata, pa nema ni govora o bilo kakvim skandalima koje ste pokušali proizvesti svojim tekstom, koji predstavlja klasičan primjer objave tzv. lažnih vijesti. RAK je to dodatno potvrdio svojim saopštenjem (<https://www.rak.ba/bs-Latn-BA/news/1641>), u kojem je detaljno pojašnjena besmislenost navoda da privatna kompanija uvodi poreske obaveze.

Baš kao i bilo koji drugi operater, Telemach je u konkretnom slučaju samo prihvatio ponudu Nova BH za reemitovanje kanala, te shodno tome zaključio ugovor o reemitovanju kanala NOVA BH, a sve kako bi svojim korisnicima osigurao praćenje programskog sadržaja NOVA BH. Telemach posebno naglašava da cijene svojih postojećih korisničkih paketa nije mijenjao.

Kada je u pitanju nova ponuda Nova BH, dodatno i samo usporedbe radi, ističemo da je naknada za reemitovanje koju potražuje Nova BH uporediva ili niža od one koju npr. za reemitovanje paketa kanala RTS ili Pink u BiH zahtijevaju njihovi emiteri, pa je s tim u vezi Telemach ponudu NOVA BH prepoznao kao prihvatljivu i konkurentnu, imajući u vidu kvalitet i dostupnost programskog sadržaja koji se emituje na kanalu NOVA BH, iz kojih razloga smo istu i prihvatili.

Za nanošenje štete prouzrokovane objavom netačnih i tendencioznih navoda obratićemo se nadležnim institucijama, kako domaćim i međunarodnim."

Pozivamo Vas da tekst demanta objavite na Vašem web portalu u roku od 3 dana od dana prijema ovog Zahtjeva.

Uz objavu demanta, molimo da nas obavijestite o tačnom nazivu i adresi izdavača Vašeg portala, kako bi se tužba za naknadu štete koju ste nam prouzrokovali objavom ovih kleveta usmjerila i na ispravan naziv izdavača.

Sarajevo,  
17. januar 2020. godine



S poštovanjem,

Admir Drinić, direktor

